

朱太復文集

朱太復文集卷之四十一

五湖朱長春太復著

書

上印川先生潘司寇書

昔者偃禾起禾之變天以顯姬公流言之無他故成
王光昭今業實有大風之助焉今四方河洛之思棟
橈之懇積於臺下解組之後五季矣夫古唐帝四姓
之臣其功德食人者皆享子孫千餘年之祀臺下活
民於魚鱉者國之半而身蒙不貲退處天豈有意雪

之乎故河崩之灾庶几偃禾

主上賜環之典無異新迎臺下故當拜表即行耳竊
聞大臣之義國家有事不得自便天生豪傑蓋將以
平世患也臺下數載荒度之功既已見矣語曰治穡
者錢鏹而播之耨壅而獲之臺下業始平之而恐不
終成之乎夫伊考之世最多才任水惟二人然陶子
以五歲行土功歷山海號神異之童則但可佐禹後
事耳夫亦天授所開世運人材故不可強會中朝
耳目睹記具在海內又豈有五歲之聖子而老成宿

望元功如臺下不任誰為可任者臺下一出應天心
告異之象著

主上錄舊之恩內復玄圭之績外荅東山之望此千
載一時也夫姬公起不利之口人不謂擅安居東之
遜人不謂吝趨出郊之復人不謂貪老臣任國去就
無私今日天下之士故望臺下師此義耳長春戚里
後進然繫心臺下有幸不敢後於蒼生一朝信志實
倍常慶固欲跣趨階次口陳前義展轉復思終自以
不祥之人為忌是以望風九頓上記如此惟臺下賜

察

寄俞瑞洛御史同奉書

側聞門下茂昭古道 廷論歸直臨江而下臺風肅
然丈夫當此遇立義信節報

主之秋也至慶至慶然僕竊謂今之諫者率二端將
為周廩危言和衆養望而持官乎有氣男子且咲之
抑張膽亢言詆訶觸

主上而蹈禍乎無益耳於不顯之義又不然若使陳
伏納牖義出和入下被采而上無守從客居職盡乎

奇抱而坐收功曉人不當如是耶此鄭公所以百十
諫而無罪也門下義任溫厚四方繫心方今灾祲徧
寓天下咳嗽而橫求侈出令奉不給雖有達人任士
長慮無誰何則選望狼顧而自保若此譬如人神耗
精竭徒以彊陽客氣旦夕未斃然而四肢厥直榮衛
日枯恐一日卒為惡中不可救也弱夫延息勇士暴
亡門下籌此定多石畫昔伍舉茅焦起口諸人極刑
之後一語立悟世著休聲夫同鑒而先入者非其銘
善耶故愚弟望門下稱回天不望門下壯折檻也義

交夙期千里懸跼故托致下頌無謂小官開口狂舉則幸矣

上宮庶葵陽黃座師書

門士濟濟半躋華膺長春新剡野處又二年而始畢則積薪在上矣行道猶然惻心况門下之私人乎古賢千鍾不受之慕春非敢忘此於親自以揚名之務未宜異於死生則撫壯獨悲在是耳老師閣下標譽金華奕為雋宗

聖意所注大拜不遠春躬受國士之許不及此時厲

驚下效鞭策駢馳之微勲而猶且當潦倒十餘年漭
下吏百里之任勞亦細耳何足對揚休光贊顯相萬
一之業乎骯髒鞅望殊不已已自天性雖好淫書尤
甚不甘堅執無用迂儒之習憂坐三季即有不釋卷
之名徒多記醜無所試於世乃覺懣懣為蠹耳所以
信民人社稷之學亦自未妄聖人直慮其末也今年
目大水漂徙滿地殍殣吳父老以為百季未見由此
想諸方灾收、國事荒穰

主上不舉豈臣子偷晏之日願無從自請效虛懷獨

飽之歎竊計荒政如薄征以下皆所以待有業懷土之人當時周法編戶井慶民各有分後世至今浮民多於產戶

主上蠲責之仁不與沾而自又無積易散流冗動至萬萬此安得不卬食於上故常以食之無法則生為死耳獨計活此他產資以上之家猶易也因條議得一篇為其里計如此未必可行天下敢呈之門下惟老師財教適家事遠瀆留神百稽敬謝私感難盡

與黃履常水部郎書

五載長別友道所悲今足下持節還已數月矣哀人
若弟聞者何免遺迹之誚然哀人自去歲入夏來四
月抱病支離兩月家難勞瘁神理消亡幾矣清風朗
月虛付慨歎改歲粗畢諸務政將尋足下於林中數
數歲絕倒使者來言星駕且蒞矣又以敝邑令公召
當行民理當攀轅一送因不得赴會深思古人挾槩
造飲刻日炊黍高風義舉起千世雅交之氣此獨何
人而令僕以有氣之士負此節於足下羞為來世所
數奈何當今文士多岐僕嘗記足下四年前答書盛

稱壯志且滄六藝沙二氏又且遊觀藝奇以著一代
不朽是於兵家所謂搏衆奪璧之戰不與寡旗磨礪
同科舊偉足下語欲相賈勇共濟每每遭造物妬人
非勞即憂即病在官不皇在家不皇他日起家又必
不皇雄腸坐銷故少日退已覺潘年二毛冉冉老至
矣友如僕者當受難與為仁之罪足下少年得天選
之形榮名美業簇憤自壯即可無前絕葦近日所就
如何能一簇覆示之乎甚恨不得拂塵一推千古短
長明歲顛借醍醐一杯與足下班草譚都亭之下不

盡不盡

致建昌司理許我歲書

予華曰志之所在。雖逝而親。其在今則我四方兄弟之誼乎。壤割雲散。歲久音隔。其於精神之致。無弗通也。昔春官三月聯步。孤弟所領色。笑談燕。豈同異人而更以塊坐窮廬之恨。違計。聲華之寵。何能無無異之飛乎。世清網濶。論重烹鮮。長者所過。留德遺。抱響固然。大善大善。孤弟卧吳過三歲矣。坐見同輩諸丈內遷者幾三十人。今王裴清簡之望。當首。是

下他日懸水鑑拔人倫。中朝清明盛業之助也。意
孤弟將受鍾錘補劓之惠乎。俗譚者云服大布而麗
則無靡易之慕。由弟念之。生既以微庭闈之福。歸
外班之臣行。弟得幸承。

天子顯報所出之榮恩。又不敢蹈一慟毀骨之死者。
則謹奉委形。盡悴樹伐。為國遺後。楊名之務。出無悖
于鍾之戀焉。弟儻居近市附郡兩侯。皆兄弟也。然三
年公事相對。無過十餘語。杜門畫地。詩書自遣耳。他
日府往還。更多過謝。立辭。庶幾保此微尚。頗為俗民。

然時人素腸可以遠對知己故淪縷及託女翁施君
左官之遊寄見相憶耳不盡長懷

寄錢惟凝南吏部郎書

間者不見十季於此矣不聞問五季於此矣往者舒
附楚南不佞弟宦一歲無遣一介行李問使君之居
嗣奉董移則母大人病亟且扶掖而下還矣還則累
累苦上餘生安所知俗償哉又禡以二人踵歿三歲
三喪平生有情之淚揮袖殆盡日夜塊處予形支離
骨卧城邊四立之僞居內者抱終天椎牛不待之恨

外者感時艱屢憂中熱之望中者撫壯惜陰不堪五
年餘坐消髀肉之悲前有三十年蹇產家世之歎後
有半生憤烈任俠功名之懷故人知我豪士堪此乎
僕本頓傷連率以悔禍杜門求免請造招權之口遂
為里俗大輒之棄門有廷尉之羅廷絕羊求之客每
念馮公超市達言但付慨息當時同舍張陳之交欲
結附共濟雄心今見故人無負矣列郡謳歌華秩清
望足為吾黨張幟如第一歲作吏五歲家居十歲未
得遷此即有奇安施坐而老耳故人肯憐之乎儻信

鮑參之氣挾山公之知僕猶未為不堪懶人也犬馬
區區立能自效足下視僕豈鄭當時侯應侯者哉私
中不盡惟故人垂鑒

與鄭允升書

黃山人經世高士抱白駒之節于茲僕因足下交數
率娖娖闌闌之中空比欄耳難以日接叩發洪鐘無
論雜物武庫惟是尉繚翼奉甘石之奇私實有意焉
昔陶貞白以一事不知為恥此三家用非小物理關
經世雖以曲學多秘至言不傳要在知解遇耳然則

圯上無授而枕中將絕乎嘗恨吳範趙達堅自神秘
便為孤學應無闕澤諸公未得如子房所致古來妙
伎坐此沈落必衆志士所短氣廣陵散何寥寥也念
此心熱昨見北固王孝廉五百里馳書後山人借秘
冊山人慨然拈付此意高蹕不下中郎僕欲因緣請
從此例恐山人疑我漏也故要足下始終不事從吏
問之許我者願先發篋別當虔求面命山人知我有
氣人豈忍以伏稿相待哉

寄荅黃禮甫比部故侯書

昔君侯在時部中懷頌者半耳君侯行而聲日以揚
故半言不便者亦來言便慕動鄰壤凍者反衣於春
雖時激使然亦大賢之愷敏寔白於衆也門下異幹
卓致嶠不同塵此氣當求之古今世滔滔所難抑或
以矜節曠儀時齟齬招吝然大德不和高木摧風理
固然也門下保此氣尚望以砥柱天下何談一邑哉
不佞僕四率附在市民所熟英風彌深緇衣然曩所
以塞門累足豈真習元卿之高避安邑之累如足下
云大賢不屑者哉大飯不拾遺糝遠途不安矩步僕

自如此小小隱士節耳丈夫磊磊非常傑儻跼蹐之
是務何取於此名乃敢慢高於足下哉家世百罹內
難薦作哀亡悔生無所自容因以疎世如廢人耳且
僕素有文癖志大學疎今已壯矣不及此窮愁幽通
之暇發憤卒業歷成一家之計他日涉世憤憤頂毛
蒼蒼又何如悔復及哉是以矻矻上希廣川下惟絕
跡意將勤補拙之計不意多病多憂復以曠日皇皇
猶然枵腹禽行之人也進無懋庸退無文采老期忽
至功名難成此安可向門下豪士道哉足下來諭告

我黻篚之事意長力勇甚佳甚佳然僕不敢領足下
為今人之學今人心銳器小好名避勞曾勦拾恒什
無積年之辛苦而居然傲倪道在矣其行近鼠其名
近盜第取掩天下半聾聵之眼耳揚揚自得計仰不
媿古俯不圖後此雖駈一世而莠然尸祝之僕不敢
信也荆棘木者累日鐫金石者累月捻角突弁詩人
刺無序也學何不然有朝種樹暮乘陰則農夫笑之
矣士貴成名千秋之事耳竭一生之力得此於後已
長壽至幸何取目下愉快哉子雲論賦以為熟千篇

始可為之匡鼎說經老而解頤高遠夫五十而後為
詩此人皆享譽與天地並何欲速之喜足下閎才高
氣薦志妙季我明雖號多人然未有力振大雅能
追蹤數公者此速故也僕今三十六泯泯寡寡恐晚
成之難謀足下正宜努力自愛為古今一暢此道哉
公議方申足下北遷未可知後歲當得接手論文於
邨未盡未盡

寄新孝廉張君俞書

五月送足下見眉宇間氣揚揚自壯占已有滕相故

為長言期足下亦甚慷慨乃成佳識十五季鮑子之
知一朝無負喜不必言想庭闈之間躬目盛事追念
生平快心何如遇如足下可謂有子克家千鍾祿存
暢過古賢如僕者竟無足齒耳然僕往欣願足下者
富貴今已自有之願又不在此足下名家之後都
人士屬自童山之側拱把為奇豫章之林合抱尤小
足下益宜厲節茂樹以副衆望夫壯士不為五鼎多
金自奉眈明矣起家之士季歲不乏人願榮名可無
務乎同心有數相與期暢此耳領書圖荅久無止人

貴同奉用甫應計作詩兼問足下并寄私願無罪作
狂

寄宣城司理呂玉繩書

自足下停節江渚惠臨徐孺之高義於今又二季多
矣流景若馳愁人知長苦何當言計若入宛自桐川
百舍而遙自江百傳而近宛故佳地又有使君又當
拜臨之辱託此名遊亦足發壯士之懷暢羈孤之氣
常一念以為子長少陵好游未必有此賢主奈何千
載好緣當我而負乎兩季來術恆損性病骨垂危家

禍未民大母尋逝歲荒穀貴女瘦妻啼履此百函閉
門隘巷詩書自寬以消天損耳何當舉足觀遊之歡
我人情有真不堪真無解夫愁至懷父母念家世三
歲薦難五載被麻坐老壯齡內外無成詩曰鮮民之
生不如死此痛豈特剝膚銷骨之恨也天下悠悠相
知者少入籍來惟使君知我心焉長平豪我意氣自
以不吊蹇坐休問相期要在二君長平既以薄遷不
振矣蓋為俠之難容如此使君情慷兒夷近有大臣
之風異日倫鑒秉樞必使上有彙征之慶下無狹邪

之歌顧如僕者當何處之足下雖知我樸簡好任五
季之中此氣浸銷亡忙心癰骨自度無堪駘榮獨素
腸在耳出時欲乞當塗整優易地後容升斗以漸復
精理馬齒未頽顛以後為補闕報

主之計足下謂可乎選官擇途不忠不武惟冀六季
人理不受之苦猶當為都人士情憐且弛足息馬以
待後駕亦御人之道也足下相知先布其私顛無相
忘時餘吏貧有一弟不能相食欲使寄糊口於四方
周視無知敢遣相累秋中哀士之思魯有感興一篇

奉懷長平與使君苦無三鳥相通并遣此馳神長平
當尋別寄若足下先有止人便且為弟附聞之廬中
人曰夕難為懷望得報歌令我對酒一唱

荅祝餘杭

廬中人憂多日月不知安知封外之故發書始省故
人坐天柱下已四閱月矣伏承古歡損惠在舊言情
薦切人之有心誰不懷知豈獨故人念僕僕亦念故
人僕有氣之士兼抱風流之興嘗開襟結天下之豪
士淺交稀往又坐江陬幾無往還惟是三四俊人君

子文章識好藉以緣飾俗心為吏之光不敢望公里
文翁庶免虎冠名耳當時朝與夕蓬鍾捋鼓誰能前
行令公子者越江千里之思每每首醵兩歲前曾奉
手札道扁舟下吳會不佞設次陳榻署都養候者曰
日今攬示不謂沈病中殊大傷心不佞望令公子何
異謝安望子弟佳俚云何與人事者名士長志撫壯
自力何憂何勞致令榻上卧此豪骨也即如僕五六
季毀痛草中古今人理少邁不藉此氣扶體從禮寧
不奄然成不孝為天下有畧人咲哉遠意相期願公

予與張生共保此功名儻來未可量也遠遊佳山水
天忙宿好適見門下書令人羨登天目望海之興門
下但能給以數馬入山厨饋之須了不用煩冬初仇
溪道主可相累也都雅即媿相如寧不以故情叨令
客寵哉寄此馳意往矣僕去禪期尚半年此興應可
待

寄致武昌邵司理書

昔者子羽登言氏之室徐孺下仲舉之榻傳記以為
美譚蓋地固擇令令亦擇地賢者相得而名益章不

佞蓋故令舒一季舒巖邑僻在江不山谷之中其地
無賢士大夫族冢者二十七季則當時大小山鴻烈
之風雅漸落盡矣既得量移貴邦何異出樵結而被
章甫吳故東南之美不佞生里又文獻鱗次之地居
平所習聽記高才生哀然如門下數公蓋久醉心尸
祝之旦夕欣然庶幾執宓子賤師事兄事之節焉安
知不假一至之緣領空符三日遂以杖哭還里哉只
尺邈若江河此恨與悲親同族五季在此矣出處寥
遠無所從名公大人一據素腸會頗翁盧尉從事在

蒲圻者人携其家書來首哆口極頌明公淵德美政
之懿已津津動故心曰安有天下賢豪若此不得一
見又述門下與吳令公蓋語次及不佞而少衰矣則
歎息揚袂而起豈曰庶幾翁伯賢豪知不知之慕哉
英雄相期無待顧問往賢神交之風僕何分得之足
下感激向風莫知情之至也大賢固畧踈節達士不
討未同是以越千里無木而投書亦稍寄向往之雅
如此顧門下無按劍婦翁孱吏給敏不足樸無他腸
則有餘全才不易小官難容如門下借同臭之餘芬

噓拂之則覆植之德也私布腹心不敢自必

寄孫年兄崇德令書

履變四季不過語溪拜于大夫之辱僕真無心人哉
禽獸閱月有啾唧回翔故處之悲而先人受疾學宮
以歸九原飲恨中實不忍過而視焉獨計當仁兄入
茗式廬之雅又以疑於鑿坏之遁者此豈天數哉引
領惘然家弟彋彋粗通故章句之業耳自且待斲何
足為人矧僕嘗恠漢通儒如鄭康成廣師抱經數十
年尚不難千里西入關甘為季長下席之員居久而

後以笑顯若今臯比絳帳之儒嵬嵬者誰堪為馬鄭之都養哉蓋以世無博雅俗習倥傯天下始皆兒儻矣此實為吾季恧之又聞仁兄諸郎英英神令都海上奇物譬如攻玉他石之錯終日不如昆吾之一切也夫乃悞後俊乎若草野樸子進得觀習朝夕於大夫先生之緒論實私命焉寧微學學半之獲則藉福矣疎淺末學散誕狂生譬如樸馬乃今日就絡調之始也細者仁兄宥之鉅者督責之不及者援勉之是則有世誼成美之望如以彼俗嵬嵬者相處則仁兄

路人之矣弟所不敢領也

寄鄭允升進士書

僕自第時不知喜今年為足下乃喜以如足下高氣雅調詎必是為多然後知至寶終遇生材不虛豪士之平生可吐也僕兩人相結著吳中十五年不意足下太常名數相編吳人一時閑然傳稱朱鄭豈謂同調之驗在此顧亦奇矣且吾等居平往往談千秋之業鼓掌而起車不獨駕樂必和奏自蘇李曹劉潘陸顏謝誰非乘權比肩合曲唱應以呼召天下青蓮放

少陵流客。一隅隔絕。中朝士大夫。遂不挽大厝。變。今足下既起。坐中權使如僕數三輩裨翼而出。文事有望。予君才當。屢中秘。然君落拓能文。有名以故。所見格之。事故不可必也。設當作縣。若則頭以君家。阿虔相勸。僕昔有此意。君敏給。又不如我。量而後入。何不以執筆希相如。子雲業乎。不盡言。無貴相知。黃山人費山人。都同此議。

寄陳司理立甫書

三年山陰之興。竟不及賢主一遊。令人東望慨然。僕

卧久矣。壯心何所試。願在同輩。今兄弟四方。應召者五十餘人。足下與呂宣城。又吾同味石交也。彈冠之喜。豈在私情。近來天下無地無歲。不水旱寇盜四出。士伍屢譁。國虛民窮。吏偷政急。

主上既高拱禁中。而大小疏章。一切留不報。外無殺諫臣之名。而內有防口之實。僕嘗汗背念謂此相甚於廷杖。夫飄風驟雨。不終日而霽。積以重陰。霾霧數月不散。則蘊濕為毒。萬物無復生理矣。足下三念之乎。今士大夫所榮。必內補臺省。然皆為舉毗矜翊之

具招權擅威福耳有自喜多易則博一狂名席為終
身地誰肯以實心謀 國如古人涕泣之言者夫夕
郎御史即尊榮間歲所除補不下數十人亦何之為
異豪士所急政昔人所云諫官與宰相等此語是當
者歷朝無幾耳足下高氣古人之風也功名自勉耳
寧有額哉貧人無所贈行小詩一章略具六率孤憤
慷慨之意向足下知己歌之他人不敢發此狂言也
大隱園八咏亦奉去此出送題甚難不知有當高人
清興或但堪作武庫棄兵也

寄比部馬長平書

才品如足下佐郡五年始得一郎不令天下之豪短
氣乎平生慕古之懷杆世之畏兩者交戰胸中今復
使足下為前轍後車誰敢復驅方今天下以水濟水
誰為甘醎之和者防川之微已見矣慶言者必無口
有口者必不令言此何時乎唐虞濟濟吁俞之風真
若此耶天下名高之獻半出秉權治象號稱太平願
要皆表虛聲而中妙用不妙則不煖席以去僕常計
之以為不暘不雨洪範所云蒙兆其竟不知何時開

開恐必有疾風迅霆不測之候也遲弥為毒耳雖然
五六年幽憂之子坐頭白矣一室之事不知辦安問
天下向奉事臺下時英英故氣苦欲持之不堪嬾散
乍振復消此豈能落落作度外事何開口談易也徒
以憐才之私為臺下懊中又見呂宣城來對談四方
不勝舊態狂奴自見於此為詩一篇言長而志肆已
成不欲滅之遂遠送攬仁兄無宣之後多為詬媒耳
春來執手近適移家冗不得濡言

寄上翰林學士黃座師書

京兆賢書流布天下方推相士快得人謂反以得
人被逸口之訛訛也世途多畏人情難殫如此似非
盛際可有雖然積羽沉舟積毀消骨語則故然未其
至者舟為可漂之物骨無不鑠之質積則勢不勝耳
如其受口者若火之焚玉也是儻孔子所稱堅乎白
乎之說乎老師閣下自保心如皎日即舉一世而呶
呶之吾無損者禮義不愆何恤乎人之言也夫賢者
之處謗也天下有三觀始觀其以既觀其處卒觀其
安太倉相公平生義概惟以負氣繫天下重望頃辦

子一疏亦竟以負氣召天下多談此豈其以不是處不善也白首功名敗於須臾之不忍寧以相公五六十率厚養田中未了乎蓋信已過而降心少耳以故疏報一出而外議乃高申公與師臺之量彌尊不容何病不容然後見君子昔者周召之聖有不相說孔顏之契有不免疑信目常庸恒情信心聖賢難處一心自保人面不同事久議之吾不言天下有代吾言者閣下朗識已洞此矣今顧絕口不談以便乘閒居間更為罪言者地自是千古盛德事豈令傳記獨

文潞公領此美哉弟子狂竊遠獻區區老師閣下能
容造口者定不過此論也呂生被召自宣城下若見
過追而送之昇山為舟中半夜之談遠念同門趨走
故情不任慨喟因草此記上問興居壯年坐老六寒
暑叅蹇滯憤氣所不必陳今時事又不佳東南半陸
水旱連三率民搖搖有不肯坐死之氣憂心彷徨無
所試見閣下方乘權中朝願聞所以起死而惠維
來者不勝代請命

朱太復文集卷之望終

朱太復文集卷之四十一

五湖朱長春太復著

書

致蔡觀察書

日之燠也不如燿火之養為其近而獲利也臺下蒞湖二季湖之饑民賴臺下生活今儼然揔臨都會雖二百里而近然痛餒痛呼之狀終遠無號訴如失怙云故若之士民皆云荒季而失其穀如長春託龍門之御切披霧之想又一人微私亦歲更始釋服且近

念起豎傷也又習吏未久遭六年海邊僻絕之卧憂
癖自放散誕如性恐山中之猴不堪周公之服矣今
一旦欲重束縛使之幾作詭術之馬乎臺下愛我向
目末契必有為教長梧者尚願借一席蔭覆示之至
幸至幸

與李琳玄計部談文書

吳關遇琳玄令我夢寐不忘琳玄處我故周旋多恩
然僕自負度外人耳感激分甘之私不至於此長春
之望琳玄加於琳玄自望者方今天下文事大耄左

說蚤起淪溺骨髓極重難反僕自年二十來蒿目強
項不甘之云與其雄王於推結寧稟約於中朝蓋癘
淫服先民之業目披口呻手畫心規自以倚人之好
習於南荒海曲者過十年亦嘗嘗自隱匿憤畜慮其
一旅仁義之師不足當楚勢之惡輕出一敗士氣不
復可鼓又以彷徨相士四方求結同好須一天授真
人止面而事之為輔倡大義中興可望然而未得也
里中鄭允升進士居平兄禮之溫雅自成而或歉於
氣又嫌其嗜酒輟業他遇三四公面前慷慨談大雅

向我甚壯徐察其才志客氣浮慕耳似不免於蠕望
進退未有如舛玄之令上拔俗而希古薦也舛玄佛
家所謂利根有夙世之覺不緣聲聞者出此即可振
淖而鶴立世中如僕所猶卷卷則疑舛玄粗有中散
之嬾人未當於天耳僕為詩自二十七歲始時未脫
於制科章句之故又貧也俯仰口實疚病之勞苦居
半既而進則為吏禁維於孔道之救退則悲思泣涕
於廬草中而口不敢廢吟無三月手離於往牒也今
舛玄之業先於我舛玄之才情倍於我舛玄之處位

十於我琳玄之精力三於我數者皆天假之資也當
今後容避世卽署席此四資者大肆於不朽之計不
數率可班揚馬而衙曹王庶幾所云真人在茲亦是
南斗千秋文章之氣未盡又國家養士二百餘年
或此一代華國之典所寄琳玄安得無念名不易
成時不再得如僕行近四十仰白日但苦老矣日既
中而駕遠誰能哉昔皇甫玄晏齒逾弱而就傳常應
物出於羽林俠少之健兒脫身解劍而轉爲士令兩
公與琳玄校時則幾老馬不策矣然而俱以述作垂

當身之譽蓋其專也今韋弁大夫中道而習古人誰
有為玄晏病末而不廢書者而剽剽尺寸遂信手師
心自壯亦知不合於古則橫立無前之談以蓋之夫
古可勝也姬公何必繼日之仰思而仲尼比七八百
歲龍鍾之商大夫是為偽言乎此誰欺哉未必從來
才人不盡作江文通之說然而後世信者安在也此
病起於博名速馭才難而偷日多故將見彈食炙耶
夫廬井之舍匠人目巧斲之計日而落此其細耳若
以未央之壯靈光之巧雖使俞兒輸子並集於門構

吾知其不可以刻也故取材欲博儲精欲弘會古鑑
深夫木爲之飛豈一刀之力哉今日道壞甚矣起厓
夫者不以急劑林亥好自愛

致傳道李約齋公書

長春木人腐儒耳又自起家滯一吏七八年無所見
短長自效結當世賢豪獨區區一寸景行飢渴之心
如僭御執鞭則不敢讓古之士者每聞名下高風雖
在四海蒿目跽足常若神往况臺端負江南一流之
望借臨會城部中吳興又旁郡最近耳其趨風沐化

常首於他又以緣海壤里之接執民禮通謁之便一
披青天目擊道存此猶愈百舍重趼南問之苦矣生
之不辰幽我雪涕塗草中六年於茲上侘傺於犬馬
壯齒報

主之氣下虺隤於孤憤屢恤時下之居中又阻絕於
結納如深山道士見人退縮而無意閉門卧席搢手
桎足如坐囹圄耳即如今禪服未除經過國門不敢
進身欲有陳請而無由故敢徼蔡公祖之寵借言於
季路又懇夫冒突之比草野也謹稽首望風疏其雅

心夫士惡無媒而通况其未同而干澤乎此與女不嫁而乞火盖世之醜行也達人包荒遺其忿懣幸免大罪如討以繩中其損之為窮髮亦何辭

與李紉玄書

歸錢塘道中得足下復書三歎而起雅絕久矣幸有公等出千秋之事可振讀至足下盟辭益令人心懷氣壯方今四海交道誰堪以此古義進者惟是其識器不廣大業終不就如紉玄真吾所厯見高才獨恨畫地趨耳能發勇志何不可成古人僕皇皇求友多

幸矣始遇此玄妙玄無言且不敢不言又敢言言而
不言應乎但此玄好自護惜去冬至今曾無一訖惠
吾口僕雖有攻玉安所定其短長以效知已然大約
揆之詩有格調人有才情後來往往棄格工調離情
逞才是說美人之色而好畫龍者也夫評美人者憐
目使一身皆目則不成人百圍之木為大廈棟如椽
檣皆等則不成屋足下試取三百篇騷漢魏晉與唐
初盛諸君子按以律後則皆土偶矣故大要名人反
有拙韻而愈研者愈下此自其情格所至應如此耳

既至則無取於多多而逐外文掩其實是傷雅之斧也且今人亦實不知調與才調者音響具有神韻才者煥發出於情理美人容華綽約自然耳安云粉澤俯折以為麗哉此語難為俗眼道故僕吟十年餘亦不欲為俗眼喜昨陳公衡共予譚閭門公衡道予詩品自高第時時樸無色予因索公衡詩攬向公衡曰足下病我誠是然我反欲獻此病於足下此即前說也文章公事政欲相成又遇同好安敢不盡書中見足下傳陸大語而以此意相感僕昨見陸大荅詩似

涉負氣于律法不甚諧又時有時人口吻政欲與相
見一論得失今不知陸大所反唇我者亦復何等病
足下所云議亦不開說語云善視者不自見其睫僕
嘗恠世文人多犯自雄又恠其速得名自雄得雄速
名無名兩者僕安敢自蹈念夙昔盡之語今人毛豎
矣便欲足下停工取僕所呈諸稿盡賜閱定所不可
顯指所以標於上子長之史尚付人竄正諸葛之相
廣集衆思僕何等人作夜郎面目欺天下無豪乎願
足下無讓夫佛法不二尤多詎難洙泗之間听听如

也語曰山有木王則度之今使足下為僕度而僕又以足下度為度印其所是難其所疑是不當一大揚權乎足下無讓

與故鄣侯林書

不佞以新屬部民執版以謁如新婦奉榛脯厥明庭見耳賜之余豆足以成禮何沐臺下重席升俎之貺乎且率來廬居深念所傾慕名流博雅蓋神友久矣一旦披霧黻騰上下千古之談語語自快所謂象罔得珠旦暮遇解世運尚休生此英賢 昭代鴻業之

望在也以門下朗襟玄風超世自上政如凌霄之翮
難可以樊籬相籠而俗人必欲以百里才相格求門
下於繩中此蒙莊所以曳尾而步兵所以哭車也天
下多耳視每念此可歎浩嘆然願門下葆光自愛達
人慢世何物足為蒸蕙者長春雖遲暮蹇產然其涉
世不能勝吾氣自信落落久矣寧希門下之風不成
無甘妮妮習婦女子媚也交淺言深此亦俗諦僕以
為名士取意含不在慙慙之接萬里未面不可為淺
何已傾蓋而不毅盡乃侈然吐其餘惟大觀諒之幸

甚

荅舒城張明府書

蓋聞士有同巷不相通千里而相應知與不知也夫
苟志合如蘭何假聞名朝夕然後氣求則賢豪之納
結四方者寡矣僕即魯人嘗以此意託附緇衣之顏
故昨見舒人仰名下奏記抑其高山宿心不自知蹈
於未同無何接翰使從江外二千里至則不佞實於
同心聲應良自足慶矣溫指見推朽之人非所堪之
舒在巖谷中又當孔道故其民煩敝而囂又聞其數

幸荐飢之後得仁君撫摩而噢之漢良吏於此為盛
僕舊多疵政又曰夏蟲不可語於冰安得逾時相料
哉惟是二三役人所貫一率餘可任頗得真為疏名
効力臺下臺下湔被仁之亦可備前事顧問也

別林玄書

林玄足下自此遠矣河梁一尊之情外吏萬里之隔
即繫悠悠故人之懷非其至也方今天下世路第靡
大雅陵夷僕雖隱然負建鼓之求十年乃得從林玄
以林玄高氣風才又少率也穆林不朽之二三所自

有無須長春為曹丘獨惜不得與足下朝夕如昔諸
大夫聯署聚首之歡進著寅恭退諧倡和竊扶蓬之
義盡攻玉之長今林玄雖少日月易逝如僕又頽然
老近矣將恐一別蹉跎失良友之益後來短髮江湖
相視而嘆何用乎志士念此足令眉蹙夫虛美熏人
燕朋溺人衆城移人盈氣自止惰氣自廢疾氣自莽
其半外犍其半內閉近弘才大士白首莠然而名如
茵往往坐此夫淇陽之竹不矯不縛不足射遠一日
而繁弓其關立拆故僕求此義幾半生而中膏然無

成今別外玄顓與共之美才自愛長春始悟不畏無
如何矣小吟一又贈徵君左相歌一書去為謝忘奉
之契申有異日

上主爵朱脩吾公書

臧聞擇官而仕士之疾行也陳力而就義之通節也
故勇不辭難貞不敗名與其奉慕高遠強阨夫以扛
鼎其罪不減於選蠕而偷力均欺

君而自負之道也臧本起後生樗材家長東海之畔
五湖之涯不聞見四方長略徒有好脩景賢一寸狂

氣猶焉若免自希附於世名流而才具不副動多勢
舛又有療疾羸不任勤往令舒幸台下梓里比壤也
弘以傍縣必恭之義植仆柳而生之又地蕘民有淳
風僻在江淮中士吏得藉以避拙逖經尋移虞山於
江南故首號為難當時廩廩委命幾無免矣而以憂
脫然故時力猶可使也今一卧六年連哭三喪支骨
嘔血喪明失心之苦備經之矣神明銷於號慕形骸
憊於草土幹理盡於歛封所餘血肉微性存幾希耳
向故無才也即才無可復用矣夫鹽車之駕伯樂過

而泣之非泣其用之屈慮其材盡而不可復也况以下駟蹇足十年絕其水草騰效之性閉憂繫絆毛枯骨折乃敢侈然不度負千鈞之駕與上襄爭乘嶺阪之馭馬死故不惜謂一蹶而泛主人之重死足贖乎事君者量而入不入而量及其知窮力竭一敗而噬齧無奈何矣傷在躬之節壞公家之務遺知己之羞長春不此之言異時誑悞扞有司之網臺下雖欲存舊憐才左提右挈為長春理苦而請命亦難為也夫老馬為駒人苦不知尺短寸長人各有能見巧賈勇

奉名務大抱焚絲之理任剗割之利試脂膏之潔非
職之能也慎簿書謹身率衆居以恬平稍可自效優
游執版約以趨繩陪叅諷議別有徵長報

主不在一途取人惟其所器臺下能恤而寬之處以
閒假稍養數年之力復既耗之精犬馬未老當足駢
榮他效稱荅知遇如一試而顛不重振矣且職年逾
三十子尚無子六季服舍不暇冒禮置妾近過蘇門
買得一女為念嗣事之重遂携家以來妻妾數口俱
度濟而止貧裝重挈既不可復南而又恐大城巖邑

累此積毀之軀生之不圖而皇問予此又人情迫切
重計不敢不為臺下布其腹心臺下厚德清鑒愛惜
人賢汲拔後進自入吏部天下無滯才而職又託於
樹人有幸矣今日之請德於骨肉非臺下無可望敬
敢委命職自便藿食茶飴不辭攻苦寔無敢乞善地
自潤第於北道畿輔河洛齊魯之間請一稍簡渾者
免於戴星則是臺下啣沫而活之也立功未晚辭知
有路惟台慈察幸甚懼甚

與呂吏部伯繩書

歲首得李關尹寄山公詒書故好溫溫見玉繩令人
念遺跡之詩為長漢近三代已有蕭鄴輩傳此名今
益陵夷矣挽古在公等世道之幸豈不佞一人敢任
然長春曩致請量力乞簡事扎中了不及將作謬語
耶人材故有便不便長春樂託狂人目為風豪曠任
則未能而中庶幾幹理趨走實非其才今又橫加六
七年雪涕塗草人但知春故時春精已消亡矣不量
而入覆車無救且當塗者用材如掄車不足為軸猶
足為軛如相馬前不取道後可任載即如今日稍寬

長春而養之數年神恬精復後路別效或足自振事
君者寧必籌領之寄乎一意定委以不堪官人不如
馬一跌無復駕理矣仁兄故知我又目見其狀又身
在論材之司當使天下人人當能如春恐不念我至
他時不勝焚劇身病名毀官敗以負相知即欲為援
手拯溺不得出暮矣春三十餘無子已挈妻妾來北
渡河告仁兄留意官是長物似續至重亦自可念

荅孫公子成憲言詩書

病客嗜眠亭午方起梳頭則華牋至又浪浪長句也

握髮吟過不已已甚羨如長春者吳興谿中一鳴蛙
耳耳未嘗聆雅奏何承大士虛問詩近體故難歌行
似易更大不易手提萬兵布陣分和刁斗相應中材
有制之將足不敗駟烏合多多之卒臨戰苦搶攘劍
矢之中陳如雲氣如風捷如脫兔飄忽變幻殺敵如
草積而中權不移士不損此非雄豪宿將誰辦哉是
以淮陰不常有也然此談於法之內者思客麗人攄
情陶性之章寧拘拘法哉十二國風人都里井士女
信口貢情之物今為經也要有至不至耳至則有法

在儻聖筆之外三千並載安見無非拘拘者故僕苦
吟十二季矣未得窺其堂况論奧突哉對高人好雅
道其宗指如此

寄潘徵復書

暮春簇茗仲夏至濟沿途大夫都新奉德意絕假
道之私交孤滯小吏尤艱仰干不得尚書一符之使
幾作木梗流落江湖耶入幕府謁談驩如父子凡五
日盤桓資關繻驅馬疾走長安妻妾寄居城中行以
兩安尚書拔後進其宿心眷衆梓其天性然令人人

叨分如此雖決黃河以潤九里吾知不給也乃知足
下緩急之誼遠過永嘆然私念足下高識士也拔衆
見取定非錄錄而僕年近四十矣財出補一令無所
及時致犬馬區區報塞

主上取名立業以稱知己坐而頂白雖有氣何用乎
足下豁朗弘度三倍於吾節已信於天下矣應龍自
飛無賴雲霧之助願木生平野其末立見處於高松
之下雖尋丈猶曖曖也尚書鴻名駿休卓絕天下矣
為其嗣者不亦難乎伯兄宜益折節明德之務無云

家風奕奕易稱當今杜迹廬中盡發古人言沈濡日夜博其指歸論而約之上可以經世匡國功下可著一家藏名山之副古今名臣高士未有不自經術傳記中起昨見尚書深以此意相命遠贈乃合雅心敢以中藏自欺良友惟賜圖之

與舒城張大尹書

春來兩辱馳書損惠寵出廬之客德意甚盛夫天道惡盈好謙人心不然附其高而掘其汙故翟公之門有羅也何意超俗古道見於門下甚感甚幸僕舟行

遭中原蘊隆涸水饑次兩月棄家任城而馬首遂北
然徐充齊趙古列國天府都會之區茫茫盡為焚土
麥斗一錢而五民半菜色過者寒心潁賴毋論行李
之憂也入都方念江南故鄉故遊舒騎曹迎理使
君者來又聞疫癘流行合城而戕戶者纔二十餘家
行道枕死大半原間棄麥不收此尤堪痛天下嗷嗷
凶災不保此非吾等封疆之臣所隱憂哉臺下肯災
救死掩賂之仁寔合詩人匍匐之詠僕今出吏必餘
地也足下有餘畧相寄示為地方之福豈直一令食

其賜

與呂吏部伯繩書

吾里安仁令鄭允升明選風雅金玉人也弟與此君
唱和十年知其好古之氣當今無有矣知其溫恭之
度甚於吏無當也可惜此輩風流都士不處金馬棧
天之區而與我等刀筆伍已是眊美人為操白奴使
矣何堪復苦以孔道囑邑之難乎弟為此兄廣詢遊
者皆言縣惡如無米作飯理亂絲而棼之恐庖丁之
所為躊躇而况鸞刀和鳴之割乎久知仁兄憐才如

渴此君恨不介與一見弟之熱腸急友切於躬不敢
不為兄告官人如器自吏部事得改一佳地坐數年
他日收其效是足下為國恆賢也

與刑部傅汝遇故侯書

弟素有麋鹿散性不堪衣冠檻束之苦何況作吏今
六季鴈類老將至矣重習折腰向人前嚅唅真是短
氣又病又嗜眠以故託而逃拙於此抑仁兄蔽芾之
區已有曹隨之思乎長安客四十五日候郎官不至
已參差財半月耳脂車難留曲室竟阻悵悵就道如

矐目而登山傍無相導前有危巘引豆而仆矣可懼
可恨已入邑訪舊何啻三異楚規條使海口亘荒
三季成建德之鄉受其成而卧理之可以延日免過
萬幸萬幸獨生少清福素無德聲事達境而蝗先驅
殘食邑之半陞萬戶失秋嗷嗷嗚嗚不知所以拯之
賢者則歲善不賢至則歲侵天道從人巧不可避以
此思懼憂可知矣即欲脩省緣飾以從吾兄與百姓
相休噢恨遺籍闢畧終擇焉不詳俗又頑野故侯之
席未寒風聲一變掃地日以抗巧試我每詢及舊據

頭無肯語者是不得不請於仁兄也忠新令之告獎
兄弟之美弘故部之惠知賢者無讓

上東光馬大叅舉主書

長春受門下樹人之德於羣弟獨竒報門下冀本之
思於羣弟獨後十年來見猶嵬瑣青袍之吏將篚草
野猶是小禮而律以奉揚明教效義鬪知則愧死矣
師臺不為子雲之麾又從優接之鑪錘大教贈餞稠
儀壯夫有氣感激欲奮別來差池道路朔後始履新
邑正與流蝗相迎四境顓粟幾不留餘一日而抱穗

赴愬者塞門心私憐之遂以身外履丘畝內校文牘
親抱而赴請命于諸上蓋拮据馳逐期月未休且至
病矣是以羈師臺境外之問且奉命掄才訪士此雖
齊地而伏生之業寥落不振宮無數人耳又求之他
經其稽古雋偉者亦不易得竄後拔其一風調可耳
謹呈奉覽備羣公子麗澤相觀則庶幾非魯鷄伏鵠
之任也雙旌計謫守土者不能越國而送於車下新
吏又苦於藉手率畧奏候顓君子無過踈節至望至
幸

與傍縣諸公書

生平讀傳記慕齊魯郡國古風是昔賢茂宰脩蹟之
邦名士大儒振起經學人倫之故天幸得遊於斯然
封疆之限在齊燕塞上海一隅耳地無名山川之觀
俗多高齋古跡箴如也每思憑軾結勒四歷大東之
區訪其遺風攬周漢之盛抑詢望三異升諸君子之
堂問政請益以不腆敝邑不在輔車之國惟是匡扶
昭訓賴席成以自免入而問禁吏不可出於竟又逢
天灾流行蝗降敝邑會在初至不知所以振恤第虛

煩旦暮之稽閱而焦勞無得請命於上是以勤渠不自寧未有一介奉素書告至稟受於門下而使者將幣實來又謝辱之不亟其過何辭天合其成部使君之徵令旦夕至諸君公將率賦抱牘會於厯下詩曰洽比其隣婚姻孔云惠徼麟壤念同軌之好登壇而申命之鄙人其執耳以聽藐東夷之子附庸之長賓不與冠帶之盟則惟令宿滯孤植之潦倒後起無容顙託不肖之軀謹先布其私

荅茅薦卿書

國在天末海頭荒莽隘僻無所發其曠懷坐覺心褊
初至逢邑竟大蝗勤民之恤而撫視之令所不暇辭
日草草勞人心煩而南北飲食風氣不宜居一月而
病矣閉閣支頤得奉故人遠書如饑飮太牢令人狂
起此中得報遲仲秋末始見足下請告恠其早計今
來書云中道聞伯父瘍疾偶攬記漢有太學生違母
遊忽以心動乞還至則其母以是日病瘡方劇得吮
療以差相守更多歲人性所篤必有奇感今薦卿之
事何以殊此曩決計日則孝思之應耶友如薦卿忠

孝茂名令我愧恨贈言深至古道可欽然絕世之才
非儻所當夫不深藏者政非良賈也安有大直而不
若詘乎龍蛇之說僕近來乃知服此藥且又履下邑
寡務雖有心開妙才庸何所施譬夫琵琶不更則不
調驟更亦不調故喜事之非常與廢事等弟奉明訓
惟領前人之成坐而畫諾藉無過矣又弟久滯心澹
歲滿之日惟所移之無復諸丈飛揚之想吾又何求
多於此故部之役告我南馳報命病中捉筆奏記歲
晏遣奴還當別候足下於綵舞之席

報海豐劉侯書

生平無嗜好唯於佳山水有宿緣頗與高士清流携
策躡屐而周攬之此興未少試已過半生若其求士
皇皇慕林宗之風咨諏聞見十幸高曠風騷賢豪之
徒寥寥實少大雅今幾絕矣方內藉藉諸長者畫龍
虛聲僕不敢信也昨來補吏吏簿責判署大惡人懷
又平土無遊觀之奇僻塞寡四方之客陋邑稀文藻
之倫蕩蕩潦倒不堪故態消盡故向高賢發一狂言
足下何采而憐之翰牘翩翩自海上來望之令人庶

幾有秦漢凌雲之氣乎適病中起予神骨欲爽翫鶴
見飛而寡忘其檻之畜也意蓋然與僕魯人好古徒
區區無能為役世人嘲我為畫虎之狗亦無自解足
下少衰太過非所當非所當然方今溺音大盛談古
者不振矣僕二十季扼腕之憤稍有牖窺常常對名
士噤口不覺其誕願以邦國之間脩好會而陳席以
清言侍君之下風才流易得雅業難就僕何談容易
媿死媿死

朱太復文集卷之四終